

BOSNA I HERCEGOVINA
FEDERACIJA BOSNE I HERCEGOVINE
VLADA

PRIJEDLOG

ZAKON
O IZMJENI I DOPUNI ZAKONA O ELEKTRIČNOJ ENERGIJI U FEDERACIJI BOSNE I
HERCEGOVINE

Sarajevo, juli 2015. godine

**PRIJEDLOG ZAKONA
O IZMJENI I DOPUNI ZAKONA O ELEKTRIČNOJ ENERGIJI U FEDERACIJI BOSNE I
HERCEGOVINE**

Član 1.

U Zakonu o električnoj energiji u Federaciji Bosne i Hercegovine ("Službene novine Federacije BiH", broj: 66/13), u članu 110. u stavu (1), ispred riječi "lice" dodaje se riječ: "fizičko".

Član 2.

U članu 116. stav (9), briše se.

Dosadašnji stavovi (10), (11), (12) i (13) postaju stavovi (9), (10), (11) i (12).

Član 3.

Ovaj zakon stupa na snagu osmog dana od dana objavljivanja u "Službenim novinama Federacije BiH".

OBRAZLOŽENJE UZ PRIJEDLOG ZAKONA O IZMJENI I DOPUNI ZAKONA O ELEKTRIČNOJ ENERGIJI U FEDERACIJI BOSNE I HERCEGOVINE

I USTAVNI OSNOV

Ustavni osnov za donošenje Prijedloga zakona o izmjeni i dopuni Zakona o električnoj energiji u Federaciji Bosne i Hercegovine sadržan je u odredbi člana III.1. tačka f.), koji je izmijenjen amandmanima VIII, LXXXIX i CVI Ustava Federacije Bosne i Hercegovine, prema kojoj je u isključivoj nadležnosti Federacije BiH utvrđivanje energetske politike, uključujući raspodjelu između kantona, te osiguranje i održavanje potrebne infrastrukture i člana IV. A. 20. (1) d) Ustava Federacije BiH, prema kojem je Parlament Federacije Bosne i Hercegovine, uz ostala ovlaštenja predviđena Ustavom, odgovoran za donošenje zakona o obavljanju dužnosti federalne vlasti.

II RAZLOZI ZA IZMJENU I DOPUNU ZAKONA

Tačkom 2. Zaključka Vlade Federacije Bosne i Hercegovine, V. broj: 1613/2014 od 03.09.2014.g., zadužena su ministarstva u Vladi Federacije Bosne i Hercegovine da, u roku od 15 dana od dana donošenja Zaključka, izvrše analizu usklađenosti kaznenih odredbi zakona iz svoje nadležnosti sa odredbama Zakona o prekršajima ("Službene novine Federacije BiH", broj. 63/14 – u daljem tekstu: Zakon), te, na osnovu izvršene analize, izrade prijedloge izmjena i dopuna navedenih zakona, i iste dostave Vladi Federacije Bosne i Hercegovine, radi upućivanja u dalju zakonodavnu proceduru.

S tim u vezi, Federalno ministarstvo energije, rudarstva i industrije je izvršilo zadatak analizu tj. analizu usklađenosti kaznenih odredbi zakona iz svoje nadležnosti sa odredbama Zakona, te konstatovalo da u Zakonu o električnoj energiji u Federaciji Bosne i Hercegovine ("Službene novine Federacije BiH", broj. 66/13 – u daljem tekstu: Zakon o električnoj energiji), u članu 110. stav (1), kojim je propisana novčana kazna u iznosu od 200,00 KM do 1.500,00 KM, nije precizirano na koje se lice ta novčana kazna odnosi, budući da je, u tom članu, samo navedeno da će se kazniti „lice“ za prekršaj, a što bi moglo izazvati određene dileme prilikom kažnjavanja, kao i mišljenje o neusaglašenosti kaznenih odredbi Zakona o električnoj energiji sa Zakonom.

Upoređujući propisane prekršaje za pravno lice, iz člana 109. stav (1) Zakona o električnoj energiji, sa prekršajima koji su propisani u članu 110. stav (1) Zakona o prekršajima, kao i raspon propisanih kazni u tim članovima, očigledno je da su te kazne uglavnom identične, te se lako može zaključiti da se prekršaji propisani u članu 110. stav (1) Zakona o električnoj energiji odnose na „fizičko“ lice, a što je greškom izostavljeno.

Nakon ove dopune, sve dileme oko „lica“ na koje se novčana kazna odnosi, a samim tim i mišljenje o neusaglašenosti Zakona o električnoj energiji sa Zakonom, bit će otklonjene, budući da je raspon novčane kazne propisan za „fizičko“ lice, u članu 110. stav (1) Zakona o električnoj energiji, u rasponu koji dozvoljava član 22. Zakona o prekršajima.

Na osnovu navedenog, te poštujući tačku 2. Zaključka Vlade Federacije Bosne i Hercegovine V. broj: 1613/2014 od 03.09.2014.g., kojom je propisano da ministarstva u Vladi Federacije BiH, izrade prijedloge izmjena i dopuna navedenih zakona, ovo Ministarstvo je

utvrdilo Nacrt dopuna Zakona o električnoj energiji, te isti poslalo na mišljenja nadležnim organima.

U mišljenjima nadležnih organa nije bilo primjedbi.

Na 12. sjednici, održanoj 25.06.2015.g., Vlada Federacije BiH je razmatrala dostavljeni Nacrt zakona, te su, tokom rasprave, predložene dodatne izmjene Zakona, na način da se izvršilo brisanje stava (9) u članu 116. Zakona, koji glasi:

„(9) Ovlaštenja po osnovu državnog kapitala u postojećim elektroprivrednim društvima, i u društvima koja nastanu nakon prestrukturiranja elektroenergetskog sektora, vršit će Ministarstvo.“

iz razloga kako isti ne bi bio u suprotnosti sa novom Uredbom o vršenju ovlaštenja u privrednim društvima sa učešćem državnog kapitala iz nadležnosti Federacije Bosne i Hercegovine („Službene novine Federacije BiH“, broj 44/15), i svim zakonskim rješenjima odnosno upravljačkim pravima u preduzećima sa većinskim državnim kapitalom.

Generalni sekretarijat Vlade Federacije Bosne i Hercegovine je aktom, broj 03-02-570/2015 od 29.06.2015.g., zatražio od ovog Ministarstva da koriguje dostavljeni tekst nacrta zakona, u skladu sa vođenom raspravom, te sačini Prijedloga navedenog zakona.

Na osnovu navedenog, sačinjen je ovaj Prijedlog zakona o izmjeni i dopuni Zakona o električnoj energiji u Federaciji Bosne i Hercegovine, kako bi isti bio dostavljen u parlamentarnu proceduru, po hitnom postupku.

III FINANSIJSKA SREDSTVA

Za provođenje Zakona o izmjeni i dopuni Zakona o električnoj energiji u Federaciji Bosne i Hercegovine nije potrebno izdvojiti posebna sredstva u budžetu Federacije Bosne i Hercegovine.